

**Isu gereja: Pendirian UMNO selari dengan perlembagaan
Utusan Online
Ogos 20, 2011**

KUALA LUMPUR 19 Ogos - Presiden UMNO, Datuk Seri Najib Tun Razak berkata, pendirian parti itu dalam isu pemeriksaan Jabatan Agama Islam Selangor (JAIS) ke atas sebuah gereja baru-baru ini adalah selari dengan Perlembagaan Persekutuan iaitu agama lain tidak boleh disebar kepada umat Islam.

Pada masa sama, beliau berkata, tuduhan Pas yang mengatakan UMNO mempunyai tangan ghaib bagi mengarahkan pemeriksaan tersebut sebagai tidak masuk akal kerana JAIS terletak di bawah kuasa kerajaan Negeri Selangor yang diterajui Parti Keadilan Rakyat (PKR).

"JAIS di bawah siapa? Pasti bukan bawah UMNO. Yang melakukan semua ini siapa? Bukan orang UMNO. Tak kan orang UMNO boleh arahkan orang untuk memesongkan akidah umat Islam.

"Tidak masuk akal. Susahlah orang yang buat tuduhan melulu begini," katanya pada sidang akhbar selepas mempengerusikan mesyuarat MT UMNO di Menara Dato' Onn di sini, hari ini.

Hadir sama Timbalan Presiden UMNO, Tan Sri Muhyiddin Yassin; Setiausaha Agung UMNO, Datuk Seri Tengku Adnan Tengku Mansor; Naib-Naib Presiden, Datuk Seri Hishammuddin Tun Hussein dan Datuk Seri Mohd. Shafie Apdal serta Ketua Pemuda UMNO, Khairy Jamaluddin dan Ketua Puteri UMNO, Datuk Rosnah Abdul Rashid Shirlin.

Beliau diminta mengulas isu pemeriksaan JAIS ke atas Gereja Methodist Damansara Utama yang dilakukan pada 3 Ogos lalu kerana dipercayai cuba memurtadkan 12 individu Islam dengan berselindung di sebalik majlis berbuka puasa.

Najib berkata, Kerajaan Negeri Selangor perlu menyelesaikan isu tersebut tanpa melibatkan kerajaan Pusat.

"Kita tahu ini soal negeri dan kita tegaskan ini bukan soal kerajaan Pusat. Jadi kemelut yang berlaku mesti diselesaikan oleh kerajaan negeri," katanya.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2011&dt=0820&pub=Utusan_Malaysia&sec=Dalam_Negeri&pg=dn_02.htm